

# Tge politica exteriura per la Svizra?

Referat da cuss. fed. Burkhalter ils 27 d'avrigl a Turitg

DA GUIU SOBIELA-CAANITZ

■ **L'Associaziun svizra da politica exteriura (SGA-ASPE; [www.sga-aspe.ch](http://www.sga-aspe.ch)), presidiada da l'anteriura cuss. naz. Gret Haller (1), e l'uniun «foraus» ([office@foraus.ch](mailto:office@foraus.ch)) envidan ad in referat da cuss. fed. Didier Burkhalter mesemna, ils 27 d'avrigl, 17.15, en la Scuola auta politecnica da Turitg, auditori D1.1, Rämistr. 101.** Il tema tuna: «Welche Aussenpolitik wollen wir für unser Land?» L'entrada è libra; ins supplitgescha da s'annunziar (2). La politica exteriura è in quità permanent da nossa renga.

La Svizra ha 1811 km da cunfins cun quatter commembers relevants da l'Uniun europeica (UE). 72,9% da ses imports provegnan da l'UE e 54,9 da ses exports van a l'in u l'auter dals 28 commembers da l'UE. Igl è pia ina prioritad da la politica exteriura svizra da segirar las cunvegns bilaterals cun l'UE. Per questa n'è la finamira svizra dentant betg prioritara; l'UE po pia sa prestar da

spetgar dus mais u anc dapli per tractar cun Berna.

## Vegn il «Brexit»?

Prioritar per l'UE è il termin dals 23 da zercladur. Lez di duai il suveran britanic responder ina dumonda fitg clera: «Should the United Kingdom remain a member of the European Union or leave the European Union?» («Duai il Regnam uni restar in commember da l'UE u la bandunar?»). Ina victoria dal «bandunar» muntass l'uscheditg «Brexit» (da «British exit»); l'UE (passa ina mesa miliarda olmas) perdess pia var 63,1 miliuns. La resposta da las urnas pudess dependèr d'in auter problem prioritar da l'UE: Las undas da fugitivs. La Mar mediterrana, cunfin da l'UE encunter sid, la colliescha cun las costas nord da tschintg stadis arabs nua che millis e millis umans spetgan l'ocasiun da s'embartgar per l'Europa. Il magazin emnil «The Economist» (Londra) scriva en sia ediziun dals 2 d'avrigl davart il referendum imminent: «L'immigraziun è ina dumonda

nua ch'ils aderents dal 'bandunar' èn clemain ils pli fermes (...). Sch'i pon transfurmar il referendum en ina votaziun davart l'immigraziun, lura vegnan els a guadagnar» (p. 27). En lez cas vegn la struttura geopolitica dal Regnam uni a manar in segund problem: La Scozia (5 347 600 olmas) e l'Irlanda dal nord (1 840 498 olmas) vegnan probablmain a vuschar tuttina per «restar», pia er a pretendèr l'indipendenza e l'adesiun a l'UE sco agens stadis. Domadus pajais, pli pitschens che la Svizra, vegnissan lur a tractar a moda autonoma cun Bruxelles. Tut quai muntass per l'UE sfidas pli urgentas che las cunvegns cun la Svizra. La parura da la SGA-ASPE commentescha en la «NZZ» dals 15 d'avrigl: «I dat adina dapli problems ch'ins po schliar en in mund globalisà mo (...) aifer l'UE. Questa vegn pia per forza a sa sviluppar vinavant» (p. 11).

1. Anteriura mediatura da l'OSCE per ils dretgs umans en Bosnia-Erzegovina.
2. S'annunziar tar: [benno.zogg@sipo.gess.ethz.ch](mailto:benno.zogg@sipo.gess.ethz.ch)